

## EVANS, ELLIS HUMPHREY ('Hedd Wyn '; 1887 - 1917), bardd

**Enw:** Ellis Humphrey Evans  
**Ffugenw:** Hedd Wyn  
**Dyddiad geni:** 1887  
**Dyddiad marw:** 1917  
**Rhiant:** Mary Evans (née Morris)  
**Rhiant:** Evan Evans  
**Rhyw:** Gwryw  
**Galwedigaeth:** bardd  
**Maes gweithgaredd:** Eisteddfod; Barddoniaeth  
**Awdur:** William Morris

Ganwyd 13 Ionawr 1887, mab hynaf Evan a Mary Evans, yr Ysgwrn, Trawsfynydd. Yn yr ysgol elfennol a'r ysgol Sul y rhoed iddo hynny o gyfleusterau addysg a gafodd, ond ymroes beunydd i'w ddiwyllio'i hun. Amlygodd yn gynnar ei duedd at farddoni, a chafodd bob swcwr gartref. Yr oedd ei dad yn dipyn o fardd gwlad, ac felly ei daid o ochr ei fam. Urddwyd ef â'r enw ' Hedd Wyn ' mewn arwest ar lan Llyn y Morynion. Enillodd y gyntaf o'i chwe chadair yn y Bala yn 1907. Daeth yn ail orau gyda'i awdl i ' Ystrad Fflur ' yn Aberystwyth yn 1916. Yn nechrau 1917 ymunodd fel preifat â'r ' Royal Welch Fusiliers, 15th Battalion.' Cyn ymuno â'r fyddin yr oedd ei awdl ' Yr Arwr ' ar y gweill ganddo, a chyfansoddodd fwy na'i hanner yn Nhrawsfynydd. Gorffennodd hi yn y gweryll yn Litherland, a'i phostio o Ffrainc. Pan alwyd ei ffugenw ('Fleur-de-lis') yn eisteddfod genedlaethol Birkenhead, Medi 6, hysbyswyd ei farwolaeth; syrthiasai ym mrwydr Cefn Pilkem, 31 Gorffennaf. Cyhoeddwyd cyfrol o'i ganeuon, *Cerddi'r Bugail*, yn 1918. Defnyddiwyd yr elw a gaed oddi wrthi, a thanysgrifiadau eraill, i godi cerflun coffa iddo yn Trawsfynydd, gwaith L. S. Merrifield. Cafwyd ail argraffiad o'r *Cerddi* yn 1931. Hoffter ' Hedd Wyn ' oedd barddoni, ac wrth gystadlu y dysgodd ac y gloywodd lawer ar ei grefft. Carai Drawsfynydd â'i holl galon.

### Awdur

Y Parchedig William Morris, (1889 - 1979)

### Ffynonellau

*Cerddi'r Bugail* (1918)

*Y Geninen*, 1918, 51; (G yl Dewi), 15

*Cymru (O.M.E.)*, 1918, 33

### Darllen Pellach

Robin Gwyndaf, *Cofio Hedd Wyn: Atgofion Cyfeillion a Detholiad o'i Gerddi* (Talybont 2017)

[Hedd Wyn](#), Prosiect Addysg y Rhyfel Byd Cyntaf, Llyfrgell Genedlaethol Cymru ac Amgueddfa Cymru

Laura Barton, [Hedd Wyn: poetry that echoes from the first world war](#), *The Guardian*, 30 Gorffennaf 2014

Coflein: [Ysgwrn; Yr Ysgwrn Farmhouse](#)

[Yr Ysgwrn](#), cyrchwyd Gorffennaf 2019

Casgliad y Werin Cymru: [Hedd Wyn & Yr Ysgwrn](#)

Erthygl Wicipedia: [Hedd Wyn](#)

### Gweithiau

Archifau LIGC: [NLW MS 4628C: Ellis Humphrey Evans \(Hedd Wyn\): Barddoniaeth 20 cent.](#)

E. Vincent Evans (gol), *Cofnodion a chyfansoddiadau Eisteddfod Genedlaethol 1917 (Birkenhead). Rhan 1, Barddoniaeth (Caerdydd 1917)*

### Dolenni Ychwanegol

VIAF: [18401866](#)

Wikidata: [Q1388537](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

